



佛說摩達國王經

無

宋居士沮渠京聲譯

聞如是一時佛在羅閱祇竹園中與
 千二百五十比丘俱時有國王号名
 摩達王時當出軍征討選國中人民
 數百萬人皆應起從時有比丘已得
 羅漢道到其國分衛並見錄將詣王
 宮門王有馬監令比丘養視官馬勤
 苦七日王後身自臨視軍陣比丘見
 王即於其前輕舉飛翔上住空中現
 其威神王便恐怖叩頭悔過我實愚
 癡不別真偽推問國內誰令神人為
 是者今當有所治煞比丘告王言非
 王及國人過也自我宿命行道常供
 養師我時為師設飯師謂我言且先
 澡手已乃當飯我愚癡心念言師亦
 不養官馬何故不預澡手師即謂我
 言汝今念此輕耳後重如何我聞是
 語便愁憂師知其意便念言我會當
 沮洳何故令人惱耶即以其夜三更時
 般沮洳從來久遠各更生死今用是
 故受其宿殃養馬七日夫善惡行輒

摩達國王經 卷第一

有殃福如影隨形王聞比丘說罪福
 意解歡喜乞得歸命於神人比丘告
 言卿當自歸於佛佛為三界師王及
 國人民皆隨比丘到佛所稽首為
 佛作礼受五戒作優婆塞佛便為王
 及人民現相好威神光曜天地復為
 說無常苦空王於是便得須陀洹道
 國中人民皆受五戒十善歸命三尊
 月日齋戒以為常法阿難整衣服作
 礼白佛言是王及國中人民見佛聞
 經即解何以故佛言及昔摩父佛時是
 比丘作沙門王時為優婆塞淨意供
 養三日今我所在處常得其福今已
 得度世之道今來會此聞經便得須
 陀洹道四輩弟子天龍鬼神聞經歡
 喜前為佛作礼而去

佛說摩達國王經

佛說摩達國王經

校勘記

- 一 底本，金藏廣勝寺本。
- 一 三〇九頁中六行第七字「起」，諸本（不含石）作「赴」。
- 一 三〇九頁中二〇行第七字「惱」，資、磧、普、南、徑、清作「嫌」。
- 一 三〇九頁下三行第一二字「師」，資、磧、普、南、徑、清作「歸」。
- 一 三〇九頁下九行「月日」，資、磧、普、南、徑、清作「月月」。
- 一 三〇九頁下一一行「及昔摩父」，資、磧、普、南、徑、清作「乃昔摩文」。